

## UVOD

*“Stepen civilizacije nekog društva procjenjuje se posmatranjem njegovih zatvorenika.”*

F.M. Dostojevski

Od postanka društva, države i nauke, a jos od prvi filozofskih spisa, ljudi su si postavljali dva pitanja: prvo, zašto neko čini zločin, i drugo, kako nekog spriječiti da ga počini ili ponovi. Ovo drugo pitanje možemo reći da je centralno pitanje penologije.

Sva društva su kroz istoriju ustanovila norme ponašanja i društvene odnose na kojima ove norme počivaju, od prvobitne zajednice do danas. Kršenje tih ustanovljenih normi izazivalo je uvijek neki od oblika društvene reakcije. Društvena reakcija predstavlja način ostvarenja zaštite društva od delikventnog ponašanja pojedinaca i grupa. To je zapravo sistem preventivnih i represivnih mijera u cilju suzbijanja i sprečavanja kriminaliteta i delikvencije uopšte.

Vječita preokupacija društva bila je koju sankciju primijeniti i za koje inkriminacije, te kako riješiti pitanje njihovog izvršenja, a da one odgovaraju funkciji i cilju kazne. Ovo pitanje je rješavano u zavisnosti od stepena razvoja društva. Skup sankcija i njihov način izvršenja predstavljali su sistem kaznene politike.

Krivične sankcije su zakonom utvrđene mjere društvene reakcije koje izriče sud u krivičnom postupku prema učiniocu krivičnog djela u cilju suzbijanja i sprečavanja budućeg vršenja krivičnog djela. Kazne se najviše ističu od svih krivičnih sankcija, a ona se kroz istoriju mijenjala po obimu, vrsti i načinu izvršenja.

Smatra se da je kazna zatvora tj. ograničenje slobode prestupnika odlukom suda u postupku u kojem je utvrđeno da se radi o krivom učiniocu krivičnog djela, nastala negdje na prelazu iz srednjeg u novi vijek. Krajem 18. i početkom 19. vijeka kazna lišenja slobode se javlja kao posebna mjeru u registratoru krivičnih sankcija, a samim tim se pojavljuju i zavodi za izdržavanje kazne zatvora. Brojni su razlozi za uvođenje kazne zatvora, ali najvažnija je humanistička težnja da se brutalne smrtne i tjelesne kazne ukinu. Primjena ovih brutalnih kazni na imovinske prestupe se pokazalo pretjeranim, a društvo je tražilo da se iznađe rješenje za zaštitu imovine, tako da je kazna zatvora bila prikladno rješenje.

Čitajući podatke World Prison Brief, dolazim do saznanja da se trenutno u svijetu u zatvorima nalazi oko deset miliona ljudi, a da se povećanje broja zatvorenika na godišnjem nivou kreće 2-3 %. To dovodi do zaključka da se kazna zatvora veoma često izriče, što je dovelo do prenatapanosti zatvora do kritične tačke.

Prema Specijalnom izvještaju o stanju ljudskih prava u ustanovama za izvršenje krivičnih sankcija u Bosni i Hercegovini, zbog nedostatka smještajnog kapaciteta, često se dešava da se u istu ustanovu upućuju lica koja su izvršila različita krivična djela, za koja su propisane razlicite sankcije. Nerijetko se u istoj osuđenickoj sobi nalaze zajedno osobe osuđene za izvršenje krivičnog djela protiv sigurnosti saobraćaja sa licima koja su izvršila teška krivična djela, npr. ratni zločin.

Upravo zato što smatram da je ovo područje na kojem mnogo toga može da se promijeni i poboljša, ja sam odlučila da se pozabavim ovom temom.